

## CATRO XERACIÓN CO MESMO FADO CRUEL

Manuel Rodríguez López

A Montse empezou a ser mulleriña en Vilaseca, preto de Barcelona, xogando coas amigas do seu tempo nas prazas e rúas da cativa vila; compangando os estudos de música cos de cultura xeral; oíndo, a carón da lareira, os estarrecedores feitos da liorta fraticida...

Rematada aquela sanguinenta guerra, que ela non atinaba a comprender, logo chegou o día do retorno á Cidade Condal; pero a Montsiña inda tardou en se decatar das razóns da moradía naquel “refuxio” escolmado polo pai para libra-la familia dos estragos e fames da cidade e, a pesar da lixeireza con que ruaron os tres anos da súa vida rural, estrañaba o alborexar das primeiras vivencias no pobo montesiño.

No seu novo fogar en Barcelona, botaba de falta as corredeiras por agros e veigas e as camiñatas ó cume do monte para, dende alí, abranguer cunha ollada o cativo pobo e ducias doutras vilas que se enrestraban ata o horizonte.

Na Gran Cidade non podía barullar por rúas e prazas, choutando algareira á saída da escola coas amigas; a cidade era fría, un ir e vir de xentes silandeiras, pechadas nas súas cavilacións, que non falaban con ninguén; homes, mulleres, mozos e mozas en contínuo rebumbio camiño das fábricas, das escolas, dos comercios, das oficinas...

O trafego cinguíao todo, dominábaoo todo, apreixábaoo todo. A Gran Cidade é o reverso da liberdade, da ledicia de vivir, respirar, ollar, correr e inclusive cantar. Soamente na aldea os picariños son ceibes. Os paxaros non aniñan nas cidades porque eles ben se decatan que alí todo é tristeiro, enxordecedor e contaminante.

“Sempre que pudo –díxome a Montse– vou de visita por aqueles eidos. Teño moi boa acordanza das xentes, do cantareiro regato, das campás da igrexa á hora do Anxelus. Vou camiño da vellez, teño aturado toda clase de atrancos e só naquel lugar atopo acougo para as miñas dores”.

Mediados os corenta, a Montsiña sentiuse, por primeira vegada, vencellada á capital catalana. Andaba nos dezasete cando coñeceu o Delmiro, adonándose dela un aquel que arrombaba os seus degaros de troula e liberdade nos campazos e camiños abertos de Vilaseca, por un sentimento novo.

Pero os tempos eran de oscurantismo. E a Montsiña, derradeira filla dun matrimonio da clase media, con tódolos prexuicios relixiosos e de caste daqueles in-tres, sufriu as gadoupas dun paternalismo túzaro.

A nai decatouse axiña do apego que xermolaba entre o Delmiro e a súa filla. El era un obreiro galego e a Montsiña estaba para remata-la carreira de mestra. Había que tornar aquela amistade. A súa filla era merecente de mellor porvir.

“Dende a fiesta da miña casa –confesoume a Montse, afervoada como se de un feito recente se tratara– falabámo-lo Delmiro e mais eu, pois viviamos frente por frente. Ás veces o noso parrafeo ficaba truncado pola teima da miña nai; outras dabámonos por conformes cunha ollada...”.

"Os domingos cadrabamos –por un casual– na igrexa de Santa Ana para oí-la Misa Maior. Eu ía coa miña irmá máis vella e o seu home (soamente eles comprendían as nosas inquedanzas) e, á saída da función relixiosa, o Delmiro engadiase a nós e virabamos cara ás Ramblas en dereitura da casa, pasenxo, demorándonos nos postos de paxaros e flores, parolando sinxelamente...".

"A pesar de se opo-la familia, emprincipiamos a sair xuntos os días santos: Qué ledas e qué lizgairas decorrían as horas. Pero ó escurecer había estar na casa e eu renegaba de tanto control desaforado. Máis tarde comprendín que tal era a mentalidade xeral de entón e, por outra banda, en certa maneira, quizabes fora mellor que a libertinaxe de agora...".

"Na miña mocidade a xuventude era máis romántica e máis idealista porque os noivos non lles era doado estar sós de parrafeo. Poi iso as cativas mañas con que argallabámo-los nosos encontros –fortuítos– enchiannos dunha fericia que non sabería explicar...".

No derradeiro ano dos corenta, a Montse rebordaba felicidade. Na plenitude da súa xuventude casara co Delmiro. El xa era un oficial obreiro; ela, a pesar dos seus estudos, preferira traballar nunha oficiña. Gañaban inda ben e o porvir semellaba resolto.

Encetaron a nova década co froito celmoso dunha meniña que era o seu agatamento e a xoia máis prezada. A vida sorrialles. As fins de semana pasábanas en Vilaseca e, durante as vacacións, o seu deus era viaxar e, inda que curto –o Delmiro herdara a vocación mariñeira do pai– fixeron un cruceiro polo Mediterráneo.

"Eramos felices –díxome esmagada pola dor– Xa me daba o corazón que aquello era un soño. ¿Por que, meu Deus, baleiraches enriba de mim tanto asaño?".

Funlle ó enterro. O coitado morrera de accidente laboral. Era un cadro esmagador: A Montse enloitada, esnaquizada pola desgracia, a carón de súa meniña de cinco anos, magoaba o corazón. Tamén o pai do Delmiro morrera de accidente no mar; ¿Era o destino?; ¿Era unha malafada?

A felicidade duráralle pouco á coitada muller. Semellaba que o seu peito non aturaría o "shock"; pero o anxo, froito de tan grande amor, fixo o milagre. E decorreron os anos e a meniña medrou en garrideza e sabencia. As privacións da mui, compangadas cos degaros de saber da Sabeliña, conqueriron a metá. E a filla do Delmiro agasallouna cun título superior: Licenciatura en Medicina.

A Montse sentíase orgullosa:

"Ve-la Sabeliña –decíame– é ve-lo seu pai. Igual de agarimosa comigo, traballadora e teimuda ata acada-lo que se propón. É o espello do Delmiro. A ela débolelle o ter aturado aquelainxusta labazada do destino, da cal non era merecente. Agora logo serei avoa. O meu xenro, doutor en medicina, inda que menos comunicativo e falangueiro, tamén é bo. Vivimos felices os tres e, o conforto de ser avoa, dame más azos. Dime o corazón que será un meniño e levará o nome do avó. Acordárono así os meus fillos: ...".

¡Coitada! ¡Non é de estrañar que louqueara! O suceso publicouse nas primeiras páxinas de todo-los xornais. A foto encollía a alma. O pé podíase ler:

"A Doutora Sabel Ferreiros Vallés morreu de accidente ó sairse da autoestrada o coche, que ela mesma conducía, batendo contra unha árbore. Os bombeiros tiveron que traballar dúas horas para dar sacado o cadáver, apreixado entre ferranchos retorcidos".

No enterro da Sabel a nai blasfemaba contra o ceo, que novamente poñía a proba o seu espírito. Diante do cadaleito, que agachaba o xove corpo exánime, froito do seu amor co Delmiro, á Montse varréuselle o xuicio para sempre. ¡Máis lle valera morrer tamén!.

"¡Que mala sorte! –salaiaba unha parente– Catro xeracións co mesmo fado cruel: O pai de Delmiro morreu afogado no mar. El, de accidente no traballo. E agora á filla e ó meniño que ía nacer, matounos a autoestrada!...".